

# HARI RAYA

## AIDIL ADHA HARI RAYA KORBAN

Bagi menyambut Hari Raya Aidil Adha dengan ria dan gembira, amatlah moleknya jika ditatap dengan tenang kupasan al-Fādil Tuan Haji Munawwar Khalil, mengenai erti korban dan pengorbanan yang kita sajikan di sini seikhlasnya - Pengarang Qalam.

“Tidaklah akan sampai kepada Allah dagingnya dan darahnya (binatang korban), tetapi yang akan sampai kepadanya ialah “takwa” daripada kamu.” – Maksud ayat 37,  
Surah *al-Hajj*.

Dalam masyarakat umat Islam disegenap penjuru dunia, pada tiap-tiap 10 haribulan Zulhijjah diadakan penyembelihan binatang-binaang ternak untuk dijadikan korban. Binatang-binatang itu telah ditentukan jenisnya dan sifat-sifatnya oleh junjungan kita Nabi Muhammad (SAW), begitu juga tentang waktu dan cara membahagi-bahagikan dagingnya.

### Erti Korban

Kata “korban” itu berasal dari perkataan Arab, yang ertinya menurut loghat ialah “mendampingkan” dan menurut istilah agama ialah barang yang dipersembahkan kepada Tuhan ‘Azza Wa Jalla bagi mencari keredaan-Nya, dengan jalan penyembelihan atau lainnya.

Di dalam *al-Qur’ān al-Karīm*, perkataan “korban” ini disebutkan hanya sekali dalam satu ayat, dalam ayat yang ke 27, Surah *al-Ma’idah*. Tafsir ayat ini ialah: “Hai Nabi Muhammad! Bacakanlah kepada manusia berita yang sebenarnya tentang dua orang anak dari anak cucu Adam, yang tiap-tiap seorang dari antara keduanya telah mempersembahkan satu “korban”, lalu Allah memberi tanda atau berita, bahawa “korban” salah seorang yang lain tidak diterima.”

Jelasnya, dua orang sama-sama mempersembahkan korban tetapi yang dari seorang diterimanya dan yang dari seorang lagi tidak diterimanya.

### Riwayat Korban.

Yang dimaksudkan dengan “dua orang anak cucu Adam” dalam ayat tersebut, di dalam *al-Qur’ān* sendiri tidak diterangkan, dan dalam hadis-hadis pun belum pernah kita dapat keterangannya yang jelas dari Nabi (SAW) – oleh sebab itu ahli-ahli tafsir telah berselisih pendapat dalam menjelaskan kata: “dua orang anak cucu Adam” itu.

Sekarang yang mustahak diketahui ialah riwayat “korban” dalam Islam. Dalam *al-Qur’ān* – tentang riwayat korban ini – ada diriwayatkan dengan secara ringkas, yang ertinya demikian:

“Maka tatkala ia (Ismail) sampai (ke umur biasa) berusaha bersama-sama bapanya (Ibrahim), berkatalah ia (Ibrahim): “Wahai anakku! Sesungguhnya aku melihat di dalam mimpi, bahawa aku akan menyembelih engkau, maka fikirkanlah apa yang engkau akan putuskan?” Ia (Ismail) jawab: “Wahai ayahku! Kerjakanlah apa yang diperintahkan – oleh Tuhan – kepada engkau itu, engkau akan dapatku Insya-Allah, daripada orang-orang yang sabar.” Maka tatkala keduanya telah menyerahkan diri, dan ia (Ibrahim) telah merebahkan dia (anakandanya Ismail) hendak disembelihnya, lalu kami (Allah)

seru: Hai Ibrahim! Sesungguhnya kamu telah membenarkan mimpi mu (dengan amalan), sesungguhnya demikianlah kami membala orang-orang yang berbuat kebaikan. Sesungguhnya ini ialah ujian yang nyata, dan kami (Allah) telah menebus dia (Ismail) dengan sembelihan (seekor kibas) yang besar". (100-197, *al-Saffāt*).

Rasulullah (SAW) pernah ditanya oleh sahabat: Apakah dia korban itu? Lalu dijelaskan oleh Baginda: "Korban itu ialah menjalankan sunnah bapa kamu Ibrahim".

Demikianlah, sunnah korban yang dikerjakan oleh Nabi Allah Ibrahim 'Alayhi Al-Salām itu telah diperhidupkan oleh junjungan kita Nabi Muhammad *sallāllahu 'alaīhi wasalam* supaya dikerjakan oleh umatnya.

### **Sebaik-baik korban**

Korban binatang ternak yang disembelih pada tiap-tiap tahun oleh umat Islam bukan sedikit jumlahnya. Tetapi sebaik-baik "korban" menurut tujuannya yang sebenar tidak begitu diperhatikan oleh kebanyakan kita. Pada hal ayat-ayat Quran yang bersangkut paut dengan perkara korban masih jelas dibaca oleh umat Islam. Di antara ayat-ayat itu ada yang demikian maksudnya: Bahawa "korban" yang didasarkan atas "takwa" atau sikap "taat setia menjunjung perintah-Nya dan menjauhkan larangan-Nya."

### **Hasil pengorbanan**

Sejarah, telah menjadi saksi bahawa dalam masa umat Islam masih taat kepada Allah dan Rasul-Nya, dalam masa mereka masih sanggup berkorban untuk menunaikan kewajipan selaku orang Islam, berkorban binatang ternak pada tiap tahun dengan berdasarkan takwa, dan selepas itu, mereka sanggup untuk kepentingan agamanya

baik dengan harta benda dan kemewahan hidup mereka, dalam masa mereka sentiasa bersiap sedia untuk berkorban walau bagaimanapun beratnya, maka kemenangan yang gilang gemilang dapat dicapai terus menerus dan dengan itu dapat pula mereka menegakkkan kalimah Allah dan hukum-hukumnya dalam ertikata yang sebenarnya.

Tetapi setelah kaum Muslimin tidak begitu taat kepada Allah dan Rasul-Nya, dan setelah mereka dalam beragama hanya mengikut orang yang bukan Nabi dan Rasulullah, setelah mereka pada umumnya banyak terpedaya oleh Yahudi dan Nasrani, dan setelah mereka dalam beribadat dan berkorban hampir tidak sesuai lagi dengan yang dicontohkan oleh Nabi (SAW), bahkan sebahagian besar tidak mengerti tujuan ibadat dan korban, akhirnya mereka tidak sanggup dan tidak berani berkorban untuk kepentingan agama yang mereka peluk. Inilah yang membawa mereka mundur dan negeri-negeri mereka ditakluk oleh bangsa-bangsa yang berlainan agama dan memusuhi Islam.

Berhubung dengan soal ini, almarhum al-'Amīr Shukaib Arsalāni, setelah menerangkan perkara-perkara yang menyebabkan kemunduran umat Islam pada masa-masa yang akhir ini, beliau telah memberi suatu kesimpulan dengan berkata:

"Bahwasanya kaum Muslimin dewasa ini hendaklah sedar dari kelalaianya, hendaklah maju dari kemundurannya, dan hendaklah siap sedia dan sanggup mengejar kemuliaan dan kemenangan sebagaimana yang telah dicapai hari ini oleh bangsa-bangsa lain. Jalannya, tidak ada lain melainkan dengan berjihad, baik dengan harta benda, atau pun dengan jiwa sebagaimana yang telah diperintahkan oleh Allah di dalam *al-Qur'ān al-Karīm* dengan berulang-ulang, dan sebagaimana yang diistilahkan sekarang dengan kata "tadhibiyah" (berkorban) oleh sebab itu, maka umat Islam dewasa ini, tidaklah dapat mencapai kesempurnaan, kemenangan dan kemajuan, melainkan dengan berkorban!"